

Biografía di Reynaldo Marcelino Kock (Ronny)

Reynaldo M. Kock miho conoci como Ronny Kock a nace na Aruba, dia 27 di juli 1944. E ta nieto di Antonio van den Linden y e yiu di mas chikito di e ocho yiunan di Placido Kock y Barbara van der Linden. Ronny ta crioyamente bisa un Savanetero, cu a lanta y biba den e bario di Savaneta. For di su matrimonio cu Rulfia Werleman, a nace dos yiu muhe. Marlina Georgina Kock y Sharlene Izaira Kock. Ronny su welo Antonio tabatin su propio banda musical di primo cu rumannan y asina di chikito Ronny a cuminsa ricibi influencia musical. Den e mundo di musica tambe Ronny ta conoci como *El Ruiseñor de Savaneta*.



Segun Ronny E bida Artistico tin su Bunitesa

E bida artistico e tin hopi manera y e tin su bunitesa e tin un rato tambe cu tin un temponan poco dificil, mester tin hopi comprension di tur banda pasobra laga nos bisa tin ora bo famia ta rekeri atencion. Anto abo ta sali ta dedica na bo tarea anto e ora e tin polarisacion anto e parti ney. Pero si bo mantenebo bon bo por keda puro den felicidad.

E Bida Artistico a cumisa cu Steelband

Tur cos a cuminsa ora cu e grupo *The Invadors* di Trinidad a bin Aruba pa toca. Nan a toca den diferente club rond di nos isla tambe na teatro Real na Sanicolas na aña 1954. Ora di bay bek Trinidad, nan a laga nan barinan na unda awendia ta Carnaval Village. Sushu-Baby tabata traha na Lago, anto hunto cu Naldo Brown nan a tuma e barinan over, nan a busca mas tocado y hunto a traha for di e patronchi di e barinan existente mas bari. Asina 'steelpan' a cuminsa na Sanicolas y bira conoci rond di nos isla. Mas y mas hoben

kier a siña toca 'panchi', e nomber crioyo cu el a haya. Un boca tabata bisa otro, te cu a yega na Paul Connor y Edgar Connor cu no ta nomber nan desconoci den e mundo di steelpan. Sanicolas tabata hopi conoci pa su steelband. Ora ta papia di steelband di e añanan ey, nos ta papia di un grupo cu mas di 50 tocado. Den añanan 50 *Club La Fama* a cuminsa cu un grupo di steelband bou direccion di Dennis Jones. E zonido di e panchinan a atrae Ronny y mientras e muchanan tabata den un break, el a bay toca riba un bari. Dennis

Jones a tuma nota di esaki y a pidie pa drenta den e grupo. Den transcurso di tempo el a sigui desaroya su mes te yega na dirigi e grupo y traha bari. Ronny a yuda diferent districto of bario cu nan grupo di steelband, di Savaneta te Tanki Flip. El a duna su aporte na tur bario y organisacion pa nan por tin nan mesun grupo di steelband. Tempo cu *Caribbean Hotel* a habri su portanan, Trio los Conquistadores y Ronny tabata e promenan pa toca den e hotel.

Desaroyo Musical riba Steelpan

Segun Ronny E a duna su aporte na tur bario y organisacion pa nan por tin nan mesun grupo di steelband.

Na momento cu nan a descubri aardgas na Hulanda, Ronny a bay traha na Hulanda y a laga tur e barinan pa Rafael "Raffy" Camacho. Na Hulanda tabata un poco mas dificil pa mantene e grupo hunto, como cu tur hende ta biba leu di otro. Cu hopi esfuerzo, Ronny a logra, door di su trabou na Bronswerk, yega na barinan nobo y asina haci hopi presentacion. Na final di aña 1967 Ronny a bolbe su isla y na su yegada e rumannan Lee a acerc'e pa toca pa nan den paradanan di Carnaval. Asina Ronny a cuminsa busca tur e miembronan di antes pa forma e grupo *Jumping Jewels*. Cu e grupo aki nan tabata toca na casi tur hotel local. Tambe e portanan a cuminsa habri pa bay toca den exterior. *Jumping Jewels* tabatin hopi integrante, mayoria ta musiconan hopi renombra riba nos isla. E grupo tabatin un repertorio hopi varia, di folklore te na musica clasico. No tabatin un fiesta cu nan no a keda sin presenta y nan a biaha masha hopi mes den vecindario. Na aña 1972 Ronny a retira for di e mundo di steelband y a cuminsa enfoca riba guitarra, maske te cu 1975 ainda e tabata yuda algun grupo.



Segun Ronny mas y mas hoben kier a siña toca 'panchi', e nomber crioyo cu el a haya

Desaroyo Musical riba su Guitarra

Na cas di su welo Antonio, den e kamber di mas pazuid, tabatin diferente instrumento colga. Ronny semper a gusta bay cas di su welo pasa wak cada instrumento. E ta corda cu cada instrumento tabata mara den un 'saco di man' maron, cu nos tabata conoce antes. E tabata encanta pa scucha y admira e banda di su welo toca. Ronny su tata tabata toca guitarra y asina cu apenas 4 aña ya Ronny tambe a cuminsa toca guitarra. Remarcabel ta cu Ronny ta toca e guitarra cu man robes. Na scol nan no por a siña Ronny cambia su manera

di toca. Ronny nunca a cambia e posicion di e cuerdenan. Mas bien el a keda toca e guitarra net pa robes. Ronny ta comparti cu e teoria pa toca el a bin siña, hopi mas despues cu e tabata por a toca caba, for di un serie di buki di Guillermo Gomez. Ronny a siña su mes. E buki tabata siña bo akkoord, scala, bara y tur cos cu tin di haber cu un guitarra.

Na aña 1946 Ronny cu algun colega musico a lanta e scol DO RE MI FA SO LA TI DO y asina a duna varios hende les di musica. Ronny a toca na diferente hotel, tanto den banda, como trio y solista. Cu su guitarra Ronny a pasa un sin fin di aventura, pero e bunita ta cu su guitarra e por a sigui haci musica te dia di awe.

Segun Ronny cu su guitarra a pasa un sin fin di aventura



E parti Internacional

Via oficina di turismo Ronny a logra di representa su isla na diferente pais Latino Americano. Ronny a toca na Venezuela (Caracas – Pto Fijo-Valencia), tambe na Brazil y Colombia. Ronny ta conta cu e tabatin un contract cu *Aruba Concord Hotel* y esaki tambe a habri porta pa e por a toca na *Concord Hotel* di Isla de Margarita. Door di biahenan asina, Ronny por a comparti podium cu hopi artista internacional conoci. Grabacion di tur disco a tuma luga na Colombia, ya cu antes no tabatin studio di grabacion na Aruba. Despues di tempo Rufo y Antonio Lacle a bin cu studio di grabacion.

E parti Religion

Ronny ta un persona hopi religioso. Tres biaha el a bay peregrinacion na Lourdes, Sto Domingo y Mexico. Aki na Aruba e ta toca den diferente parokia y koor di misa. Segun Ronny, su don ta bin di Dios. E ta comparti cu el a cay varios biaha na caminda, pero cada bes el a logra lanta bek y sigui cana riba e bon caminda. Ta riba e bon caminda bo mester ta, pa duna un bon ehempel y pa bo por ricibi e don di mas bunita cu ta arte. Musica ta sali for di bo alma, bo mester cultiv'e.

Ronny su Inspiracion

Tin hopi artista cu a inspira Ronny, cuminsando di su welo pa su tata te na Padu Lampe. Ronny ta conta cu e la yega di toca cu Padu na Tele Aruba tempo cu ainda television tawata den preto cu blanco.

Boluntad

Ronny tin un luga special den su curason pa trabou caritativo. Semper e ta para cla pa yuda. Tur yudansa cu Ronny a brinda na e gruponan di steelband tabata trabou voluntario. Tambe Ronny a compone varios cancion pa Voz y Landia. El a toca den diferente koor di misa, guia diferente grupo y cantantenan local

sin laga afo su trayectorio largo como un di pioneronan di 'steelpan'. Un artista cu un curason grandi pa yuda su comunidad. Loke mas el a bin ta aprecia di e mundo musical aki, ta cu el a siña conoce hopi hende y pa medio di su musica haci hende feliz. Actualmente Ronny ta toca den Trio Oro.

Sugerencia pa future generacion

Ronny ta termina su entrevista cu lo siguiente.
Nan ta bisa na Spaño: 'Cultura se hace la patria.'
"No laga loke bo tin para un banda, e ta un don cu bo a haya, sigui desaroy'e y si ta posibel pasa algo over pa e hubentud".